



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim

tiryimyim@aolima

tir yimyim

TAPAK 3

Chennaiyin FC coach asütsü Owen Coyle shimogo

Internet shibangtsüba democracy ji India dang lir: Shashi Tharoor



VOL. XX NO. 274 (ADOK 274) DIMAPUR TENTONÜ (MONDAY)

CHITENI (JULY) 17, 2023

₹ 5.00

COTU-i ghonda 72 tashi NH-2 mokdangtsü

Imphal, July 16, 2023

(Agencies): Manipur nung tensa mejungi akümba ajanga Committee on Tribal Unity (COTU)-i July 16 ayaterm nungi tenzüker ghonda 72 National Highway-2 mokdangtsü metetdaksüogo.

Deobarnü Bishnupur aser Churachandpur tsüingda arrtsülen ozüing alema inyaksangshiba sülen ghonda ishika lir COTU-i NH-2 mokdangtsüba lemtet agi.

"Tanep Kuki-Zo nunger amakba, ki rongdoktsüba aser nisung tepsetba anema onoki July 16 ayaterm nungi NH-2 mokdangtsü lemtetogo.

Myanmar nung amenoka aliba telungpurtemi Manipur telungi aiter tanep 10:00 ako meta amak" ta COTU General Secretary Lamminlun Singsit-i ashi.

Tanep Tangbuh yimtsüing nung khatap aser ki rongdoktsü. Iba ya Bishnupur district anasa Tinkai Kholen nung atalok ta Singsit-i ashi.

Indigenous Tribal Leaders' Forum (ITLF)-ia iba tatalokba khukhua aitsüogo aser tebilemstü abenba osang metetdaksüogo.

Ano, July 15 nü Imphal West kübok Sekmai yimtsüing nung tetsürtemi Kuki-Zo nunger ka indang LPG cylinders abenba truck gari asem rongdoktsü.



Advisor for Transport and Technical Education, Temjenmenba-i July 15 nü NH-702D lenmang repranga jajaba mapang tangokba noksa nung angur. NH - 702D ya talisa district 5 - Mokokchung, Tuensang, Zunheboto, Longleng aser Noklak den ano temeket Wokha aser Shamator-tem asoshia taküm lenmang lir anungji iba lenmang majungba dak sentakba atema azük nung alirtem lemsateptsü aser tim mera agitsü ta Advisor Temjenmenba-i ashi. Pa sülen Mokokchung D.C, Thsievisie Phoji, SDO (C), SDO (PWD-NH), SDPO Mangkolemba, Changki Village Council aser NDPP Mokokchung region nungia ketdangtsür kar anidaka liasü.

Assam nung lisopurtem ashiokja tamangba yimsü memelendaksütsü

Guwahati, July 16, 2023

(Agencies): Sorkari lisopurtem indang sobaliba kümzüka ayutsü aser nisung shingaia lisopurtem ashioka tanga tamangba yimsü agizükdaksütsü memerangtsüla ta Assam Chief Minister Himanta Biswa Sarma-i ashi.

Guwahati nung Khilonjia nunger tribal institutions 18 shia nem Rs 10 lakh agütsüba sentong ka nung CM Sarma-i iba osang metetdaksü.

Iba sentong nung Assam sorkarisa district 22 nung tekülem ki 73 shia nem Rs 5 lakh agütsü.

"Nisung shingaia ozü lisopurtemtem ashiokja tanga tamangba yimsü agi memeyipdaksütsüla. Asenoki parnok alemli nungi amanga aruba aser inyaksangshi kümzüka ayutsüla" ta CM Sarma-i ashi.

"State sorkari Khilonjia nunger aser lisopurtem indang

sobaliba ajungketsü aser wazüka ayutsü tenangzüka lir" ta paisa ashi.

"Assam sorkari nangzüka ama kin balala rejutem aser tekülem kitem nem senotsü teyari agütsütsü sentong renemogo. State sorkari kin aser lisopur telok balala indang sobaliba aser tamangba yimsütem kümzüka ayutsü atema kanga meranger" ta CM Sarma-i metetdaksü.

Assam sorkari tawa tu Department of Ethnic and Tribal Faith tentetogo.

"Sorkari oshi, sobaliba aser tamangba yimsü balala kümzüka ayutsü meranger. Iba mission nung shilem ka ama Assam kübok district 22 nung tekülem ki 18 shia nem Rs 10 lakh aser sarasadamba tesem 73 shia nem Rs 5 lakh teyari agütsür" ta CM Sarma-isa metetdaksü.

Dimapur police-i NTPRADO ketdangpur 5 apu

Dimapur, July 16, 2023 (TYO):

Nagaland Legislative Assembly (NLA) nung MLA 60-i Uniform Civil Code (UCC) pusema bill agizükra parnok ajunga indang ki rongdoktsü ta Nagaland Transparency, Public Rights Advocacy & Direct Action Org. (NTPRADO)-i amokmerenba atema Dimapur Police-i NTPRADO ketdangpur pungu puogo.

Iba ken o jungjunga bushisüingdanga aruba sülen register süa maliba NTPRADO ketdangpur pungu apu ta Dimapur Police-i sangdong ka nung ashi.

Par pungu ya President Michael Tungoe, General Secretary of Public Policy Ikato

Zhimomi, General Secretary Albert Kire, State Executive Member Temjen Mar Ao aser ChiefAdvisor Hayithung T. Lotha nunger lir.

Parnok anema nisungtem ajungmesoba, MLA tem anema mapa inyaksü tasa atongba aser tensa raksatsüsa sorkar kiojen samatsütsü amokmeren ken o tem benoka lir.

Dimapur nung aliba East Police Station nung NTPRADO anema FIR ka benokba sülen par pungu apu.

June 30, 2023 nü NTPRADO-i Uniform Civil Code magizükba metetdaksü aser NLA ajanga UCC pusema bill agizükra tashiyim mapa inyaksü ta sangdong ka nung shia liasü.

Manipur nung Naga tsür ka tepsetba aitsür: UNC

Dimapur, June 16, 2023

(TYO): Manipur nung Honibar nikongdang Lucy Marem ta ser Maring Nagatsür ka tepsetba atema tejashi sayua United Naga Council (UNC)-i ghonda 12 mokdangtsü metetdaksüogo.

Hombarnep 6:00 ako nungi nikongdang 6:00 ako tashi Manipur nung Naga nunger aliba tesem ajungalen mokdangtsü aser ghonda 48 tsüingda UNC-i akhangba onüktem ama meinyakra tanga mapa inyaksü ta Information & Publicity Wing, UNC-i sangdong ka nung metetdaksü.

Imphal East District kübok Sawombung (Ukhrul road) nung Meitei nunger Arambai Tenggol-i Lucy Marem tepset. La ya Narum (Beaulahram) nunger Thoukhal Marem'er jala liasü, ta UNC sangdong nung shia lir.

Meira Paibi temi tashiyim agi

Lucy pur Arambai Tenggol ket nung agütsü. Arambai Tenggol nunger ya tawa nija tentetba telungpur telok ka lir aser parnok Manipur nung ozüing alema mapa inyaka arur. Meira Paibi-i parnok ya yimjung bener arurtem ta ashir saka parnok ama tetsür telok kati nisung tepsetba mapa nung yariteptsü ta kodanga mebilem liasü ta parnok ashi.

"Tai maketba Naga nunger ta metetsümong tashiyim mapa inyakba ya aitsür. Meitei aser Kuki nunger tsüingda mepetmesü adoka rarara arudang Naga nungeri yimjung alitsü ateam inyaka arur saka tangatetba tamajung alir kari onok iba rara nung dendaksütsü merangba ya odangbo meyütsütsü" ta UNC-i ashi.

Tesüiba nung Naga nunger kiojen samatsüding, reshikangshidang aser

mezüingmeshi asüding onoki aremzüka aser kecha meshii toktsüba ya onok tashimaitba ajanga ta mebilemstüla, ta UNC-isa ashi.

"State sorkari Lucy Marem tepsetba ken o atema Judiciary Inquiry Committee ka tangsa tentetsüla aser Meira Paibi nunger dena la tepsetertem aputsüla aser tatishitsü beshitsüsa parnok nem temerenshi agütsütsüla" ta parnok metetdaksü.

Naga Customary Law den putepa Naga tsür Lucy Marem tepsetertem merenshitsüla, ta UNC-isa takhangba agütsü.

Iba tesempatsü mapa atema Meitei Civil Society Organizations-ia kasa tebilemstü khuret abentsüla aser iba osang ya yimjak nung metetdaksütsüla ta UNC-isa metetdaksüogo.

Delhi Police-i Meitei o Kuki nunger dak tenük yoker

New Delhi, July 16, 2023

(Agencies): Delhi Police indang special branch kati intelligence division, traffic police aser PCR dang Meitei o Kuki nunger inyaksangshi nung tenük yoktsü tetuyuba agütsüogo.

Delhi nung Meitei aser Kuki nunger tsüingda rara adoktsü aser law & order tensa ka

adokdaksütsü akok ta osang kar angazükba sülen Delhi Police-i iba tetuyuba agütsü.

"Delhi nung Meitei aser Kuki nunger inyaksangshi nung tenük yoktsüla aser parnok indang social media accounts kanga junga reprangtsüla" ta Delhi Police-i metetdaksü.

Manipur nung Meitei aser

Kuki nunger teimbaka Munirka, Safdarjung Enclave, Kishangarh, Patel Chest, Vijay Nagar, Burari, Mahipalpur, Khirki Extension, Mukherjee Nagar, Sunlight Colony, Nehru Vihar, Gandhi Vihar, Shanti Niketan, JNU hostel, DU main campus aser Rajouri Garden nung lir ta parnokisa ashi.

Dimapur kübok Thahekhu nung train aser gari tsüktep



Dimapur, July 16, 2023 (TYO): Deobarnep 11:00 ako meta Rangapahar aser Dimapur railway station tsüingda passenger train kati gari ka den tsüktep.

Iba lendong ya ozüing memelaba railway level crossing ka nung atalok saka tia kaa nisung asüba mesüra yiruyibongba maliasü, ta

ketdangtsür kati ashi.

Train lenmang nung Lalgargh-Diburgarh Avadh Assam Express süidang Thahekhu yimtsüing anasa gari ka train lenmang adena sütsü merangdang train den tsüktep ta Railway Protection Force (RPF) ketdangtsür kati ashi.

Iba lendong ajanga train senzüba nung timtem kecha maliasü aser akhi ama train tem senzür ta ketdangtsürisa ashi.

Iba lendong atalokdang gari nung driver dang mena liasü aser pa jena ao. Iba gari pua lir aser RPF station nung FIR ka benokgo ta paisa shisem.

Dimapur Police ajanga mobile phone 110 kibur nem agütsü



Dimapur yimti nung mobile phone samar mesüra ayuar alibatem East Police Station, Dimapur ajanga bushiteta tejangja kibur nem meyipa amoktsüba sentong ka Commissioner of Police, Dimapur indang Conference Hall nung July 15, 2023 ayongzüka liasü. Iba mapang mobile phone 110 tashi tejangja kibur nem amoktsü.

Dimapur, Chiteni/July 16 (TYO): Commissioner of Police, Dimapur kübok East Police Station ajanga July 15, 2023 nü Commissioner of Police indang Conference Hall nung sentong ka ayongzüka tejangja kibur nem mobile phone 110 amokja liasü. Item mobile phone ya sama mesüra auya ta osang agütsüba sülen police temi nguteta liasü.

Iba sentong nung Kevithuto Sophie IPS, Commissioner of Police, Dimapur dena liasü aser pai ashiba agi, tanü-asüng mobile phone ya kanga tongtipang kümogo saka meshidakba nisung keti aodang lendong akümer, kechiaser nisung kari phone nung yua

aliba nü indang jurila osangtsüsang mesüra data amshitettsü aser ibaji ajanga ashikülak mapa inyaksü, nü maitüsü ayatsü (identity theft) aser danga cyber crimes inyaksü.

Anungji mobile phone amshir ajaki pei indang mobile phone kanga kümdanga amshitsüla, anungjidang shinagia mashi lenmang nung mamshitsü, ta pai ashi.

Paisa iba sentong nung adenertem dang mapa tamajung azüoktsü asoshi pei aliba tesem nung mapa tamajung inyakba lira police nem osang agüjang, ta mepishia liasü.

East Police Station nungi

ketdangsür aser police temi meranga inyaka samar aliba aser ayuar aliba phone tem tanaben ngutetba asoshi pai tenüngsang agüja liasü.

Kasa sentong nung Vesupra Kezo, DCP Dimapur ajanga mobile phone amshia cyber crimes balala inyakba indang rateta ashi aser parnok dang cyber crime majurutsü asoshi mera agia kümdanga alitsü ajungshia liasü.

Mobile phone samaba aser ayuaba indang tsüngsü aputsü aser samar aliba mobile device block asütsü atema nüburtemi Department of Telecommunication indang CEIR portal nung osang agütsütsü akok, ta pai ashi.

Dubai nung mapa inyaksü maongka agütsür

Dimapur, Chiteni/July 16 (TYO): Zünger mapa mangu aliba lanurtem, tetsür aser tebur (freshers tem densema) Dubai nung aliba luxury international jewellery brand showroom nung inyaksü jangra alirtem asoshi maongka lir.

Itasen ya 33,000 nungi 37,000 den Sales Incentives agütsütsü, kong teshimtet candidate temi mela-mela ita nung sen 50,000 junga aatsü.

Iba den ano talitsü ki, mapa nung chiyongtsü, medical

insurance, joining air ticket, employment visa den küm ana contract aser UAW labour laws nung aliba teyari ajak angütsü.

Class 12 pass sür alir aser iba dang temaba zünger alir tejangrar temi reusme, temang ajak adoka noksa aser Indian passport (first & last page) indang scanned copy tem July 17, 2023 nikongdang 2:00 ako tashinung 8730899943 dangi WhatsApp asütsü akok, ta sangdong ka ajanga ashi.

Dimapur nung mejangjaba nisung tasü mang ka lir

Dimapur, Chiteni/July 16 (TYO): Arishi küm 60 shi tain mejangjaba non-local tebur ka July 16, 2023 nü Dimapur District Hospital nung temang anepaluba mapang asü, shiba East Police Station, Dimapur ajanga July 8, 2023 nü süchia orr anir arua Male Ward nung admit süa liasü.

Ozüng agi melaba maparen ajak tembangba sülen tasü mang

ya PM examination/identification agitsü atema District Hospital Dimapur Morgue nung yua lir.

Asür indang kibur/kinunger/tembar temi Officer-in-Charge, East PS Dimapur den 7085055020 ajanga tongteprateptsü akok, ta Dimapur Police sangdong ka ajanga ashi.

Assam Rifles temi mapa tajung balala inyak



Dimapur, Chiteni/July 16 (TYO): Naga Hospital Kohima nung teintet rogo ka shiranga munga aliba kinungertem nungi azü O+ve nungdaker ta July 16, 2023 nü HQ IGAR (N) kübok Assam Rifles dangi call ka arua liasü.

Shiranger jenjang mejungi aliba angateta Assam Rifles temi kanga kera telangzüba agüja azü agütsütsü molunga alirtem idangjisa Naga Hospital Kohima tonga liasü.

Mapang shidak nung azü agütsüba ajanga arishi küm 65 tain shiranger yaria liasü. Assam Rifles temi iba ama mapa tajung inyakba asoshi shiranger kinunger aser mozüki ketdangsür temi pelaba lemsatepa liasü. Battalion ajanga küm ana tsüngta Kohima nung azü unit 135 tashi agüja lir.

Ano Assam Rifles temi July 15, 2023 nü Mon district kübok Wangti yimadak security meeting ka ayongzüka liasü. Iba senden nung Wangti, Langshai Wangti, Ranpha yimtsüngtem nungi GBs, Village Councils, CSOs aser Village Guards tem dena liasü.

Ajak senteper iba senden nung yimtsüng balala nungi lenir 25 dena liasü aser battalion ajanga region nung nüburtem asoshi mapa tajung balala inyakba atema tenüngsang agüja liasü.

Maneni Assam Rifles temi Mon district kübok Chenloisho Village nung aliba tekülem kidang nüburtem den sensaksemba mapang ka agia liasü. Iba sentong nung kibong 97 den GBs, VGs, kaketshir lenirtem aser tetsür lokti tentet nungi lenirtem dena liasü.

BJP 27 Mokokchung Town Mandal ajanga nüburtem ajurua jajatsü

Dimapur, Chiteni/July 16 (TYO): Nagaland nung PDA sorkar (kong BJP ya tongtipang alliance ka lir) indang sentong balala mandal nung grass root level tashinung oa metetdaksütsü nükjidong nung Bharatiya Janata Party 27 Mokokchung Town Mandal ajanga Social Outreach Committee ka tenteta liasü.

Iba Committee ya ita shia Mandal executive senden amenba July 15, 2023 nü amendang ajaki molungsoa tenteta liasü.

Mandal indang general secretary, Pranab Singh-i ashiba agi, BJP indang yimyim "Sabka Saath, Sabka Vikas" den apet nüburtem tenzüksü asoshi iba Committee ya party

karyakartas temi mapang talangka nungi aginüa aru.

Taruba ita ishika tsüngta Social Outreach Committee yagi sentong balala yanglutsü aser mapang lemsar agitsü. Committee yagu government agencies, kanga tangatetba aliba NGOs aser kija den lungjemer sorkar indang scheme balala nüburtem nem metetdaksütsü nükjidong nung inyaksü.

BJP 27 Mokokchung Town Mandal tir Lanusunep-i ashiba agi, iba Outreach Programme nung takok angutsü imlar, kechiaser sorkar indang sentongtem ya nüburtem dak rangloker yangluba kisüng agi masü saka 27 Mokokchung Town Mandal nung aliba

nüburtem ya tazüng-tashir dang aser nüburtem ajungtsü asoshi yakyaka inyaker.

BJP 27 Mokokchung Town Mandal ajanga iba Committee nung convener ama Bendangmeren (State Council Member) shim, Bendangyanger (BJP District Secretary) aser Lanusunep (President, 27 BJP Mkg. Town Mandal) na Co-conveners ama shim.

Maneni Pranab Singh (General Secretary, 27 Mkg. Town Mandal) aser Temsunungla (Mandal Secretary) na Member Secretary aser Asst. Member Secretary ama shim aser parnok den Committee züngsem pongu shima liasü.



Kohima nung Imchen's Custom Art School lapokba mapang, iba sentong nung shilem agirtem den tanurtem noksa nung angur. Iba Art School ya Wb.Moa Imcheni lapokba lir. Pa ya Animation nung Master degree anguba designer ka lir. Pai 3D Architectural aser Graphic design, Clay sculpture aser katana forge design mapatem inyaker. Pa dak aliba sempet aser temetetba agi tanurtem tajung küma anitetsü nükjidong nung pai iba school ya lapok. Iba sentong nung Wb.Dr.Ato MLA aser AG mepu nung mendenbuba Wb.Neizokhotuo Belho nati tajungshi aser tepela o jembia liasü aser Rev.Dr.Toshi Langui iba school aser tanurtem atema sarasademtsü. (Kohima, July 16, 2023)

Tuensang district NCORD Committee ajanga pharmacy tem sendang

Dimapur, Chiteni/July 16 (TYO): Tuensang EAC, Toking-i anir District Level NCORD Committee ajanga July 14, 2023 nü Tuensang Town kübok pharmacy ajak jangjashiba maparen inyaka liasü.

Parnoki iba mapang certified pharmacies, sales registers,

mozü, CCTV inoka aliba aser GST registration paper tem repranga liasü.

Committee ajanga pharmacy kibur ajak dang sorkar aser District Level NCORD Committee ajanga totuyuba agüja aliba ama inyaksü tekumdangtsü shia liasü.

UAE-India tsüngda rupee agi shishilembatsü; Abu Dhabi nung IIT amenoktsü



July 16, 2023 nü Abu Dhabi nung Ato kilonser, Narendra Modi-i Lulu Group International Chairman & Managing Director, Yusuff Ali M.A ajurudang tangokba noksa nung angur. Kasa noksa nung UAE Tir, Mohamed bin Zayed Al Nahyan-a angur.

New Delhi, July 16 (Agencies): Honibarnü Ato kilonser, Narendra Modi-i UAE yimtiba, Abu Dhabi semdanga UAE Tir, Sheikh Mohamed bin Zayed Al Nahyan den senden amendang lenir anati lenla aika nung amalitepa inyakba jenjang tajungba akümtsü atema jembio.

Lenir anatisa linük ana tsüngda 'rupee' sen agi shishilembatsü bangjemba den külemi India aser UAE na tsüngda Fast payment systems sendakteptsü aser Abu Dhabi nung IIT-Delhi campus ka amenoktsü telemteba agiogo. Tena senden amenba sülen Modi-i twitter ajanga, "UAE semdangba tembangogo. Alima

tajungba akümtsü nukjidong nung asen linük anati onük aika atema inyaker. Pelaa agizükba atema ni HH Sheikh Mohamed bin Zayed Al Nahyan dang pelaba lemsateper," ta metetdaksü.

India aser UAE nati linük ana tsüngda dollar agi masü saka rupee agi shishilembatsü atema tezüngzüktep ka agiogo. Linük anatisa India nunger Unified Payments Interface (UPI) aser UAE nunger Instant Payment Platform (IPP) sendakteptsü atema tezüngzüktep agi.

Reserve Bank of India (RBI)-i ashiba agi, tezüngzüktep ana agibaji ajanga arrtsü adena shishilembaba

aser senotsü agütsütepba temelaba akümtsü aser rongsenketzüng tsütsü amalitep jenjang ano tajungba akümtsü.

Modi-i United Arab Emirates (UAE) semdangba mapang nungsa linük ana nungi education ministry anati UAE nung IIT Delhi campus ka amenoktsü tezüngzüktep agiogo.

UAE Tir Sheikh Mohamed bin Zayed Al Nahyan den senden amenba sülen Modi-i, yaküm linük anati Comprehensive Economic Partnership Agreement agiba sülen linük ana tsüngda shishilembaba shilem 20 agi teimba kümogo, ta metetdaksü.

Congress party-i Delhi Ordinance anema AAP pusemetsü sangdong

New Delhi, July 16 (Agencies): Amongnü Aam Aadmi Party (AAP)-i, Congress-i Delhi ordinance anema AAP pusemetsü ta shiogo, anungji parnoki July 17-18 anogotem nung Bengaluru nung ayongzükba opposition senden nung adentsü, ta metetdaksü.

Sangküm Lok Sabha election agitsü lia BJP anema longjemer tokteptsü nukjidong nung Congress-i ayongzükba opposition senden nung opposition party 24 shi adentsü.

Iba senden jakdang Congress lenir, Sonia Gandhi-i opposition lenirtem atema chiyungba sentong ka ayongzüktsü, aser iba sentong nungji Congress Tir, Mallikarjun Kharge-a adentsü.

AAP-i, "Onoki iba sangdong pelaa agizüker. Iba denji külemi AAP-ia Bengaluru nung ayongzükba aliba senden nungji adentsü," ta metetdaksü.

Tamalen AAP-i, Delhi ordinance anema Congress-i party pusem nung dang parnoki opposition senden nung adentsü, ta metetdakja liasü; ajioda Amongnü nikongdang tashi nung Congress-i, parnoki Centre sorkari benokba Delhi ordinance anema nokdaksü, ta metetdaksüogo.

Iba dak sendakba nung

JD(U) lenir, Khalid Anwar-i, "Onoki parnok telemteba pelaa agizüker. Iba ya ajanga Congress-i chichiba linük temzüng akhümtsübuba sayur," ta metetdaksü.

Mezüngbuba opposition senden Patna nung Bihar chief minister, Nitish Kumar-i ayongzükba amen aser iba senden nungji party 16 aden; tang Congress-i Bengaluru nung ayongzükba opposition senden nung party 24 shi adentsü akok.

Bengaluru nung ayongzükba senden nungji working group asem tentetsü akok aser parnoki Lok Sabha election atema opposition party tem atema külem onüktem renemtsü. Iba senden nungjisa opposition teloktep atema tenüng ka sangdongtsü aser party tem tsüngda menden lemsatsü atema jembitsü, ta osang angazüker.

Karnataka Pradesh Congress Committee Tir, Saleem Ahmed-i, TMC tongti lenir Mamata Banerjee, NCP Tir Sharad Pawar, RJD Tir Lalu Prasad, Tamil Nadu Chief Minister MK Stalin aser Rashtriya Lok Dal (RLD) Tir Jayanat Choudhary nunger densema lenirtem aikati iba senden nung shilem agia adentsü ta shiogo, ta metetdaksü.

Internet shibangtsüba democracyji India dang lir: Shashi Tharoor

New Delhi, Chiteni/July 16 (Agencies): Amongnü Congress lenir aser MP, Shashi Tharoor-i twitter ajanga, mapang shia internet shibangtsüba atema sensotem timtemdaksüba democracy linükji India dang lir, ta metetdaksü.

Manipur nung kin tsüngda raraba ajanga internet shibangtsüba dak sendakba nung Supreme Court-i iba ken o angadangtsü anogo ka jelia Tharoor-i, internet shibangtsüba ajanga rara nokdangtetsü ta Parliamentary Standing Committee on Information Technology-i bilembaji shidak ta ashitsüsa kuli mali, ta ashi.

Thiruvananthapuram nungi

Congress MP, Tharoor-i twitter ajanga, "Iba ya ketdangsertemi benokba mera ka lir, koba ajanga security ajangzükdaksüba dang nungibo sensotem nem timtem ang tuluba agütsür," ta ashi.

Paisa, "Sensotem banking, credit card transactions, enrolments, examinations aser osangtsüsang balala angutsü atema sensotemi internet amshiba ketdangsertemi nokdangba telemtebatemji masü saka sensotem temeden atema Supereme VCourt-i nokdaksü, ta ni amanger. Iba ama inyakyim ya tangsa Court-i nokdangtsüla," ta metetdaksü.

Manipur High Court tetuyuba ajanga state nung

internet tenokdangba agienba anema state sorkari benokba temepishiba ken o Supreme Court-i Hombarnü angadangtsü.

July 7, 2023 nü Manipur high court-i obendang ka ajanga state sorkari internet nokdanga aliba agientsü metetdaksü, ajisiüka state sorkari court obendangji tashi mangai Supreme Court nung ang temepishiba ken o benok.

Manipur nung rara adokba sülen tang tashi Ato kilonser, Narendra Modi-i iba dak sendakba olen kecha mejembir. July 20 nungi tenzüka tzungluruwa mongpu Parliament senden alidang Congress-i iba onük süoktsü, ta metetdaksüogo.



July 16, 2023 nü Gandhinagar (Gujarat) nung G20 Finance Ministers and Central Bank Governors (FMCBGs) senden nung United States Treasury Secretary, Janet Yellen-i jembidang tangokba noksa nung angur.

Ajit Pawar-i aniba teloki NCP Tir, Sharad Pawar ajuru

Mumbai, July 16 (Agencies): Amongnü Mumbai nung Maharashtra Deputy Chief Minister, Ajit Pawar leniba nung lenir kari Nationalist Congress Party (NCP) Tir, Sharad Pawar ajuru.

Ajit Pawar den MLA 8-i NCP toktsür Maharashtra teloktep sorkar nung adenba sülen tang mezüng parnoki NCP tongti, Sharad Pawar ajuru.

Osangbenertem den jembidang Praful Patel-i, parnoki temoatsü meshitsü aser party longjema alitsü atema Sharad Pawar ajuru, ta metetdaksü.

"Onoki teti akhümtsübua aliba Sharad Pawar dang nungi temoatsü meshitsü atema onok yagi aru. Onoki Pawar dang NCP longjema alitsüla, ta shiogo. Iba dak sendakba nung Sharad Pawar-i telangzüba kecha magütsü," ta Patel-i ashi. Sharad Pawar ajuru

senden amenertemji Ajit Pawar den Patel, Bhujbal, Hasan Mushrif, Aditi Tatkare aser Dilip Walse Patil nunger liasü.

Kasa senden nungji Sharad Pawar-i aniba NCP state Tir, Jayant Patil aser party lenir Jitendra Awhad nata aden.

Yakünü Maharashtra nung teloktep sorkari Ajit Pawar-i aniba NCP telok nem finance ministry densema department trok agüja liasü.

Ajit Pawar leniba nung NCP MLA 8-i Maharashtra nung Eknath Shinde-i aniba sorkar nung adenba sülen hopta ana dang lirbo Cabinet ulushia parnok nem menden lemsatsü.

July 2 nü Ajit Pawar den NCP MLA-i Maharashtra sorkar nung minister tenangzükba agia liasü. Parnoki NCP toktsüba ajanga Sharad Pawar-i aniba NCP telok nung telesa adok.



July 16, 2023 nü New Delhi nung Delhi Minister, Atishi-i tzmetsüng agi kongshiba agi Lohewala apu anasa relief camp nung jenoka alirtem ajurudang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, CHITENI (JULY) 17, 2023

Dimapur nung kibur lir mali ?

Nagaland-sa süaka ajak meyong ditrict aser ajak meyong yimtibo Nagaland nung Dimapur ya dang lir, kechiyong tanga district-bo Chümoukedima dak alaka district shia Naga kin kaka kibur lir. Iba jagi district shia tatishitsü agi, Kohima district ya Angami nung, Mokochung district Aor aser Mon district Konyak nung ta asüba ama kibur meteteteta kin kaka lir. Iba jagi, item district-temjibo kibur meteteteta tenüngsanga aser nüngsena agir. Aji oda, pei kin akhüm kübok pei district shiaji pei meyong küma anepalur. Ajisüaka, Naga nung ajak meyong asütsüsa moatsüba district aser yimtibo Dimapur ya dang lir. Ibayongji, Naga nung ajak Dimapur district yabo pei district amato meima anepalutsü imlar. Aji oda, Dimapur ya ajak meyong süra, Dimapur nung akaba rongsen aser government kiojen ajak arok meyong lir. Ajisüaka, imlaba aser bilemba amato masü, Dimapur district aser Dimapur yimti yabo kibur maliba district aser kibur maliba yimti-ang ka mesüka kümdagi. Anogo shia amato Dimapur yimti yabo ajanga süir aser ajanga süi shia Dimapur yimti tiyong ajangba lenmangtem memerükba memerükba aser tamajungba kümer angur. Aji oda, Diphu aser Golaghat nungi arulen aliba Nagaland gate nungi reprangyonga arura Dhobi Nallah nungi MP Road leni aoba-ang tamajungba, City tower leni NL Road leniang aobaang tejanaba aser tamajungba, ano külen flyover tejenbabo tejereper aser külen flyover tasenbabo taokera mali, Super market ajanga Dhansari apu tashi jana-jana dang reprangyonga atutsü. Ashiko, telidak purtemibo kecha balaka mereprangteti alitsüa akok saka yimti tezülen majungbajibo yutsür, yimti tiyong ajangba lenmang ana NL Road aser MP Road na prongla lenmang tiyong tera merükba dak alaka, Municipal Council-a mali ama, tachiji tabenlen tezü anatsülen anak-auyi, lishi aser teshinem agi sünger yimti yimdong nung jajartembo tenük tebang nembanger senzüsüba jenjang nung lir. Atangji, asenokbo yimya sübadok nungji kecha balaka masütsüa akok saka tangar tsüngdang asenokbo asen yimti yimdonga merüka meyutetbaji taaktsüka aser iba jagi asenoki memeteti asenok Naga nung ajak tangar bendanger tsüngdang akhüm samadagi ta bilemdi. Aji dang masü saka district tasenba Chümoukedima aser Niuland na dena atema Dimapur nung dang Arts, Commerce aser Science college lapoka lir, saka tang tashi Science stream-bo metenzükter aser ashi kechiba ta tebusir kibur mali ! Ano, Dimapur nungsa akhidang tenzükba state stadium ka merenemtet anendaka lir, tang yangji shiruru chiremer aser gari anishitsü angazüdakang tesem tajung ka kümogo. Ajia kechiba merenemteter ta ola adoktsüsa kibur mali ! Aji shinga meyonga masü amai tokja lir. Dimapur nung tenüngteta tetshitsüsa "land mark" tesem ka dang lir, aji City Clock Tower saka iba Clock Tower nung Clock mali, saka kibur malijito koda asütsü ? Dimapur Private bus anendak, NST aser Railway station-i odangang, ano MP Road dang nungibo NST aser Railway station-i aiba lenmang süklep ishikajisa majungba, tarok paidoker mepaidokba, kena Transport aser Railway minister-ang süidaktsünüka bilemer, saka kibur maliji ajia koda masü ! Ano, asenoki Super market ta tetshiba, koba dang shitakba agibo Naga Shopping Arcade ta ajatsüla, iba tesem ya tenüngbo tulu saka jana endokdak, motzü awatsüng küma atsüngdak aser machimajemtsü ayokdak tesemang ka kümogo, ajisüaka kibur malijito kechi ashitsü ? Ano, tanga center government-i Dimapur nung Unity Mall ka yanglutsü asoshi sen crore 145 lemküka lir, ajia Dimapur-bo kibur maliji tanga district nungang yanglutsü amai angazüker. Atangji, kibur maliba district aser kibur maliba yimti nung kechikodaser mapa patetkaji inyaktsü ? Ajakji yutsür, Dimapur Deputy Commissioner office kima reprangdangang, tesem tajung tesadem, nisungtem anisüngzüka mena kazüdak aser gari anendak naro tsüki agi topur jungjunga yanglunütsüka, saka kibur maliji to, ai apungdoker mali ser arem nung linük wako songa yutsü amai angutsü. Atangji, Dimapur nung Naga kin senso telongjemtem, Naga kin kaketshir telongjemtem, Naga kin lanur telongjemtem, Dimapur District HQ atema nokdakertem aser Naga Council ama Naga yimteni kibur küma Dimapur mereprangra, Dimapur nungbo yimsüsürtema mali ama yimdok kümdagi !

OLEMSABANG

UNION/ASSOCIATION TENZÜKBAJI PAR ZÜNGSEM ASOSHI DANG.

- S. T. Yapang Lkr, Kohima

Tawa Nagaland Ambulance Association tenzükba Ambulance car kibur aser driver karibo magizütetba noksaküm ka ngua asen nisung tasü maitba aser tangar olulu nem anishikdaktsüba nungji jenbua alitsü asoshi lephiba lemsateper.

Union/Association ka tenzüktsüji pei mulung, aseni ibaji anema apusora asen ang aibelener akümtsü akok, saka ajaki metettsübaji iba union/association nungji tetennür atentsü (voluntary) ashi temzüng agi ajak kangshia atentsüba iba Union/Association dak tashi mali, aser par union züngsem asoshi kechi temzüngsa lateter aji par union/Association nung züngsema alir asoshi dangashi madenertem asoshi parnoki temzüng amshitsü makok, aseni yamala ajurudang ola madoki yutsüra mesüra aibelener Union/Association anema idangjisa FIR magütsüra/ keno mebenokra alima raksar tulutibaji asen asütsü.

Asen Nagaland nung Taxi union/association tenteta lir, saka yangji taxi anishir ajak adentsüji Govt. temzüng nung mali, aser na taxi union/association nungji medenra taxi union ozüng agi na alentsü makok, aser taxi union nung adener dang taxi anishidaktsütsü ta shingaia meshitettsü. Kechiyong taxi permit union/association nem masü neja nem agütsür. Ajisüaka Union/Association nung medenra asen ajungbena lentong timtem aser telungpur sarusaji amala nung asen kija, shinga teyariteper mali ta bilemang. Ano Union/Association kaji takar anungji parnoki alizüka parking yanglura yangji asen manentettsü, saka Govt. lenmang nung koba RTA/RTO ajanga Taxi parking tesem lemkütsür, ibajibo Taxi union nungji madenyonga anentettsü, Taxi union nem RTA/RTO ajanga information agütsütsü akok, saka aji agi Taxi Union-ji kibur masü.

Ni ajangshia aruba nungi tatishitsü ana amshia shidi, ni 2008 aser 2009 nung zonal taxi tangar indang anishia liasü, iba mapang len tom nung telok mashi kati anendaktsür khenkhenbo Taxi Union ID card asüngdanga liasü, saka Ni Taxi Union nung dena mali nenoki aji temzüng ka süa bushidi süra nenok anema ni tang FIR agütsütsü ta dang langzür yutsü.


Ni tang Kohima nung shishilembar ka lir, saka ni Kohima Chamber of Commerce & Industries nung züngsem mali, mapang ka KCCI saru asoshi Dokan-i aru, ibaji dokan ajak asoshi ta shia liasü, anungji Iba telokji mulungtet telok ka dang, ni yangji madentsü ta dang shir yutsü, aser Kohima nung dokantem asoshi koba KCCI ajanga temzüng lateter ibaji parnok asoshi dang ashi ni yangji maden aser par ozüng agi ni alentsü makok.

Union/Association tenzükbaji junger anungji ano aika tenzükang, saka aji temulungertem asoshi dang, medennürtem madentsü, aser par teloki lemtetba temzüngji par züngsem asoshi dangashi madenertem asoshi masü.

Asenok ya terabo tasü itdi aser temelenshiji aseni adokdaktsüdi, kechiba asen jarapok nungi atsüker repranga atatsü aser tangari dang mermeshi (tenüng tamajung) agia temelenshiji bener arutsü? Arung aseni anir lenmangji pipoka aotsü, iba inyakyim arogo mungdang ajak nung kasa benshitsü, nüngdakra ali shi agi Tsüngrem tenzüker dakbo tama (slap) amatsü, office/menden nungia atsüzüka yutsütsü, parnok anema okadaka keno benoktsü, aseni ola madokra asen akoksa dang, alima ya asen sülen dang alima sülen asen masü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Sight & Sound Theaters-i Daniel otsü sayatsü



July 16, 2023: Sight & Sound Theatres-i tesüiba mapangtem nung Laishiba nung aliba kanga tongtibang otsü balala parnok indang theater nung sayaogo aser maneni sangküm parnoki Tejen Lai nung ainakar, Daniel otsü sayatsü.

"Daniel" otsüji mezüng sangküm March ita nung Lancaster, Pennsylvania nung aliba parnok indang theatre nung sayatsü.

Tawa interview ka nung jembidang producer, Kristen Brewer-i, "Laishiba i n d a n g nungi seret oa jangratemtsükaji; iba

ya teti agi mapang tetemsü dang asür," ta ashi.

"Onok team ka lir aser onoki item maparen atema kanga sarasadema inyaker aser asüngdangtepa inyaker. Yamaji onoki melungtetba ama inyaker, ajisüaka tanela temeshi nem onok anidaktsür," ta paisa metetdaktsü.

Sight & Sound team-i Daniel otsü production atema 2021 küm nungi maparen tenzuka liasü. Daniel indang mangdang aser shin otem Laishiba tsütsülen nungi seret oa asadangtsü atema

team-i Daniel kaket ya shilem ana kuma lemsar inyaka aruogo.

"Mezüngbuba shilemji kanga nüngtugu otsütem lir aser tanabuba shilemji shin otem aser mangdang angubatam lir," ta Brewer-i metetdaktsü.

Iba production omen Lai tekongji Daniel 12:3 asütsü; iba Lai nung yamai shia lir, 'tangartem temeshiba lenmangi anirtem kodak nung tatem maka petinu ama ayatsü.'

2020 küm Sight & Sound TV tenzuka liasü aser tangbo parnoki linük 175 dak tema ayimjemogo.

Madhya Pradesh state nung Khristan putir ka bail nung chiok

July 16, 2023: Madhya Pradesh state nung high court-i Khristan putir ka nem bail agütsü; putir jagi tribal tanurtem Khristan yimsü dangi meyipdaktsütsü merang, ta pa nem tai tonglokja anti-conversion ozüng kübok police-i pua liasü.

July 13, 2023 nü Madhya Pradesh High Court, Jabalpur bench-i Mandla district nung Jabalpur Arogoi lapokba school manager, putir Sibi Sebastian nem bail agütsü.

July 14, 2023 nü osangbener den jembidang putir kati, "Iba ken o ya tiyazü nung benokba liasü aser Khristantem den Arogoi lapokba rejutem tenüng menüktsütsü atema inyakba lir," ta ashi.

Taküm March 8 nü Madhya Pradesh Child Welfare Committee nung züngsem, Yogesh Parashar-i police dang, Khristan putir jagi school tanurtem Khristan yimsü dangi meyipdaktsütsü meranger, ta shia ken o benoka liasü.

Yogesh-isa, putir Sebastian-i juvenile justice law aser Scheduled Castes &

Scheduled Tribes (Prevention of Atrocities) Act ozüng alema Dalits aser tribals tanurtem nem mapa tasak inyakdaktsür, ta tai tonglokja liasü.

July 13 nü Justice Vishal Dhagat-i, "Tanurtemi parnok yimsü meyipdaktsütsü atema shingaia kecha meinyak ta shiogo," ta metetdaktsü.

"Iba dak alia tanurtemi parnok nem mapa tasak meinyakdaktsü, ta shiogo," ta shia Justice Vishal-i Khristan putir nem bail agütsü.

Taküm March ita nung special judge kati Sebastian-i mepishiba bail magizükba sülen pai maneni high court nung kasa temepishiba agüja liasü.

Madhya Pradesh nungsa Arogo lenirtem anema ken o aika benoka lir.

Tang Madhya Pradesh nungsa anti-conversion ozüng kübok Jabalpur nung tongti putir Gerald Almeida aser kasa Arogo nungi nun ka na anema-

a ken o benoka lir, ajisüaka June 22 nü High Court-i Almeida aser Congregation of

Mother Carmel nungi (nun) Sister Liji Joseph na maputsü oshidang agüja lir.

Taküm March ita nungi tenzuka Central aser state sorkartem child rights committee temi Arogoi lapokba schools, hostels aser orphanage homes mita aoer aser anti-conversion ozüng kübok Arogo lenirtem aser ketdangsertem anema ken o benoker.

July 14 nü state yimtiba, Bhopal nung osangbener den jembidang Arogo lenir, Daniel John-i, "Tawatanü ka nungi onok indang rejutem aser Khristantem anema inyakba kanga bulua kümogo," ta ashi.

Shidakba agibo child rights committee tem jagi schools, hotels aser orphanages ano tajungba dang akümtsü atema inyaksüla, ajisüaka parnoki Arogo aser Arogoi lapokba rejutem tenüng menüktsütsü ang meranger, ta ashi.

Nütsüng million 72 aliba Madhya Pradesh nung nütsüng shilem 0.29 dang Khristantem lir.

ANOGO ABEN TSÜNGREM DEN

Anogoshia Tepela

T.ken 118:19-29

"Kibubai yangluba anogoji ibai lir, asenoki pelateptsü aser iba nung pelaa alitsü" (t.24). Kodang nai item timtem anogotem ajurudir- yipru mopung arudang, rara adokdang, kodang khuretji taret kümдар, kodang ne mulungjang raksadir, kodang ajaki na anema arur ama bilemdir, kodang ne Kotaker Tebui na toktsür ama bilemdir- iba mapang nung iba tekong ya tamang agi temulungjang nung tenoka shisadangang.

Ken zülur tongpang rara aser timtem ajanga oa liasü, aji saka pai ya shiteta liasü, "Tsüngremi iba anogo külemi yutsü süra ni iba nung pelatsü. Tang ni temoatsü menguaka, tamang agi ni ya ashitsü akok, tajung asoshi ibai külemi mapa inyaker. Anungji tang ni ibai ashitsü."

Süia aoba Benjung nung Yihuda nungeri iba ken aten. Yisua Pa kangki nung mangelokdang iba ken aten. Ne Kalvari leman nung nai ibai shitetsü ta bilemer asü? "Kibubai yangluba anogoji ibai lir, ni iba nung pelaa alitsü." Tanga leman ka nungi yamai ashitsü akok, "Kü mulung masü saka ne mulung süang." Yisui iba ken aten süra, asenokia ibai atentsüla.

Ne anogo tebilemtsü khuret mesüra tejashi agi mokbanga lira, ibaji Tsüngremi agütsü ta agizükang aser Pai repringdir ta metettang. Tanü Tsüngremi na asoshi kechi inyaksü, bilema liang aser iba nung pelaa liang. Nai tang Pa nükjidong mangatettsü akok saka kenü angatettsü.

God Behind Bars-i tepuokdak alirtem atema sentong ayonga katsü

July 16, 2023: Tawa Khristan Instagram ajanga, "Ibaji melungtet telok- God Behind Bars-i jail ka nung tepuokdak alirtem atema tekülem sentong ka ayongzuka katsüogo; iba sentong nungji tepuokdak alir 150 shi aden.

Iba sentong nungji sayutsüngir jagi jail nung puoka alirtem dang, "Iba takdang nung alirtem, tang mapang ya Kibuba den mapang agitsü atema senti mapang lir. Jail nung raratep aser asaperang dand alitsüa akok, anungji tang mapang yabo Yisu den mapang indokang aser nai pelatsüsa alibatam shisadangang," ta ashi.

Iba sentong nungji Brandon Lake-i atenba ken "Gratitude" tema liasü.

Jail nung alirtem pelatepa teka maa 'anungji arung, kü tanela, ken tennang, kechiyong nü tepokpok nung molusongzü lir. Nokdakang aser Kibuba nem tenüngsang agüjang' ta ken aten.

Tamalen-a God Behind Bars teloki jail balala nung puoka alirtemi Tsüngrem tenüngsang ken atenba video balala lemsatepa liasü.

Taküm June ita nung God Behind Bars ministry-i, federal jail ka nung tetsür 90 densema tepuokdak alir 130 tzü nung baptitsüogo, ta metetdakja liasü.

God Behind Bars-i

temeshi mapang ka liasü. Tsüngremi item tetsürtem taküm melenshitsür. Temesepba chiyungtsü achiba toktsür, temenen nangzuka tatok meshir aser Yisui takok ngudar," ta metetdakja liasü.

God Behind Bars-isa 'PandoApp' ta ser app ka adokogo; iba app ajanga tablet nung sayutsüngi video repringba den külemi tekülem ken atenba repringteter.

"Onoki jail tem nung satellite campus amenoker aser iba mission nükjidong ya tepuokdak alirtem nem Yisu meteta kümdaktsütsü atema lir," ta God Behind Bars nung Innovation Director, Isaac Holt-i metetdaktsü.

June ita nung jail nung puoka alir kati, pa kanga azüngmeyaka aliba mapang nung pai tekülem kentem atener, ta ashi.

Tawa tepuokdak alir kati, "Jail nung jashia nisung tamajung akümtsüji kanga temela. Ajisüaka ni Yisu Khrista den tesendaktep ayuba ajanga ni pelaa alitsü angazükogo. Küm 30 tashi tepuokdak ayutsü kü nem obendang agüja lir, saka ni pelaa dang alibaji nisungtemi mangateter, ajisüaka iba tepelaji Tsüngrem nungi lir, ta ni meteta lir," ta ashi.

AO OSHI ANGAZÜKDAK:
TANÜ ANGAZÜKTSÜBA OJANG



Repoktsü

(v) lisü agi azük (lash)

* Nashinükeri nashi dak lisü agi **repoktsü**.

Repozü

(v) aritepa arakzüka senzü (move in hurry)

* Ozü kinunger alui aotsü **repozüa** alidang yipru ait.

OLONG PAITEP # TELANGZÜBA

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

- 2. Auonung chiyongsü asenba
- 5. Mangyimba mapang
- 7. O tamendakdak
- 8. Pei dak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüing
- 3. Tenarong maten
- 4. A ___ g
- 6. Mopung apodoka
- 9. Tongtipang tagitsü
- 10. Menungra bilem
- 11. Aiür
- 13. S ___ k
- 14. T ___ r

OLONG PAITEP # TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.



ALOKBA O WARAKLA NA PARTY KA NUNG :



Warakla : Aya tambu, na ya tan agi pezü ben buba chiyungtsü abeni serving table-i oya angur akoti, tangari koma pilem ya lidir.

Alokba : Hehehe, ni chiyungtsü abeni aoba shia ya na atemaa ta sa shir bener arur akoya.

Warakla : Oh Alokba, mekümtetka!

~ Lilir : WhatsApp

Manipur nung jang 1543.23 metric tonnes akoksatsü



Bishnupur district kübok Irengbam yimtsüing nung sepaitemi anükba angur.

Imphal, July 16, 2023
(Agencies): Manipur nung tensa majungba ajanga aluyimba wadang nung kanga mejungi kongshiogo aser aluyimertem tetsübu tia ka nung lir.

Manipur nung alu aika meyimtetit toktsüba ajanga sangküm tashi nung jang 1543.23 metric tonnes shi akoksatsü ta asadangtetogo.

Tarutsü anogotem Manipur nung food insecurity mesüra food crisis majurutsü atema state sorkari maparen kar tenzüko.

"Manipur nung ali 195000 hectares nung jang tsünia liasü aser taküm June ita tashi nung 5127 hectares tashi alu mayim liasü. Iba ya Rs 39 crores shi akoksaba asütsü" ta Agriculture department Director Ningthoujam Gojendro-i ashi.

"June ita tashi nung ali 5127

hectare nung alu mayim aser alu meyimi dang toktsür sangküm Manipur-i jang 1543.23 metric tonnes akoksatsü" ta pai ashi.

"Bishnupur district nung aluyimertemi takoksa tuluba ajuruogo aser takoksa tajemba angubaji Jiribam district lir. Bishnupur nung ali 2191 hectares aser Jiribam nung 37 hectares meyimtet" ta Gojendro-isa metetdaksü.

"Takoksa jenti majurutsü atema sorkari maparen aika tenzüko. Lendong ataloktsü akok ta bilemba tesemtem nung aluyimertem anüktsü atema sepaitem mapa lemsütsügo, aluyimer new metsüjang lema agütsügo aser urea fertilizers peria dang angur. Tarutsü anogotem Manipur nung food crisis mesüra food insecurity majurutsü" ta paisa ashi.

"Onoki urea alemtsü atema SoP ka sangoktsüogo. Aluyimertemi district agriculture office-i orr urea fertilizers meshitsü akok. Urea anguba aluyimertem tenüing system nung zülüoktsü" ta Agriculture department Director-isa shisem.

Külen, Centre-i Manipur sorkar dang jangotsü peria agütsütsü aser NFSA beneficiaries tangutsü tim agütsütsü nangzüko.

"Manipur nung tang FCI asertanga state agencies indang godowns nung jang 35,800 metric tonnes yua lir" ta Department of consumer affairs, food and public distribution - Director Robertson Asem-i ashi.

"Iba yagi ita ana peritsü. Manipur sorkari ita shia jang 11,358 MT agütsür" ta Asem-i ashi.

Meghalaya nung Rs 1.6 crore jenjang heroin apu

Shillong, July 16, 2023
(Agencies): Meghalaya nung East Jaintia Hills (EJH) Police-i tetsür mozü shibelener ana ket nung Rs 1.6 crore jenjang heroin puogo.

Osang tejangja ka angazükba sülen Deputy

Superintendent of Police (DSP) Jason Mairom-i anir police telok kati Silchar nungi Shillong-i aruba Tata Sumo tourist gari ka soter mita reprang.

Police-i Nongsning nung NH-06 nung check post ka yanglur mendanga ata.

Idangji parnoki Tata Sumo gari nung tetsür ana- Hoihoi Hanhal (35) aser Lhing Hohoi (40) na apu. Tenaprong ya Imphal West nung alir ta jangjaogo.

Iba mapang police-isa tena ket nungi mobile phone ana apu.

Assam-Meghalaya arrtsü atema Minister tem senden amen



Guwahati, July 16, 2023
(Agencies): Assam aser Meghalaya nungi minister tem July 15 nü ajurutepa state ana tsungda arrtsü ken o tem benoka lemsatepogo.

Iba senden ya Assam

forest & environment Chandra Mohan Patowary aser Meghalaya deputy chief minister Sniawbhalang Dar na tsungda amen.

Senden nung Assam Cachar district aser Meghalaya kübok kübok

East Jaintia Hills district nung arrtsü mangatettep benoka lemsatep.

Senden amenba sülen Minister anaprongi pei pei state ketdangsürtem dang detailed reports renemtsü tetuyuba agütsü.

Sudan army tem jembishinütsü atema Jeddah-i shilangogo

Jeddah, Chiteni/July 16 (Agencies): Sudan army nungi teshimtet nisungtem par tsükchir paramilitary forces den jembishinü akatsü atema Saudi Arabia nung aliba Jeddah-i tanaben shilangogo, ta osang ajanga ashi. Sudan nung army aser paramilitary forces tsünga rara tenzüker ita pezü buba nung mejakloka aier.

"Rapid Support Forces (RSF) den tanaben jembishinü tenzükhitsü atema armed forces nungi teshimtet telok ka Jeddah-i meyiba shilangogo," ta sorkar osang ka ajanga Honibarnü ashi.

RSF telok nungi Jeddah nung tanaben arua jembishinütsü atema sangdong kecha agüja mali, koba taoba ita ceasefire pangzüng aika nung aibelenba sülen Saudi Arabia aser US mediators temi anena liasü.

Ano Egypt-ia telok ana tsünga ita jembishinüba maparen Brestibarnü tenzüka liasü, koba Egypt den tesendaktep tajung aliba Sudan army aser RSF temi pela agizüka liasü.

Army tekolakba Abdel Fattah al-Burhan aser taoba mapang pa indang deputy, RSF commander Mohamed

Hamdan Daglo tsünga tashi agi raktepa aruba April 15 nü pokma rara tenzüka nisung 3,000 shi tepsetogo aser million asem dak tema tesem balala nung jenoka lir.

East African regional bloc, Intergovernmental Authority on Development (IGAD) ajanga ayongzüka taoba hopta Ethiopia nung jembishinü akaba nung army temi shilem magi aser tang parnok jembishinü nung arua shilem agitsü osang agütsü.

Khartoum indang foreign ministry ajanga IGAD lenir Kenya Tir William Ruto dak tai apu aser Nairobi ya RSF tsütsü lir ta aija liasü.

Jeddah nung jembishinü manandang telok anaprongi rara anentsü asoshi nungnangba ajanga US nungi tetsünga ita jembishinürtem tezü tanga akum.

Meilongi jembishinüba mapang maangka tuluba agitsü teimla nung Burhan aser Daglo nati raratsü ang molung südi, ta mongin temi amanger.

Sudan yimtiba Khartoum nung ita asem tashi rara arudang tayimtsü amshia amakba, injang-bomb tulu apokba aser prangbong agi khatepba ola mangashidang

anogo ka danga mesüyi.

Yimti nung raraba aser tesem ajaklen rakzükraktepma aser auyaba nungi jenbutüsü mechi nisung million 1.7 linük yimtiba toktsür ajen, ta United Nations ajanga ashir.

Ano nisung million aika ki telung nungi temai madokteti lir, saka azüdokshi ajemba mangur.

Honibarnü linük yimtiba northwest tsütsü nok-nü tabu balala amshia raraba aser south tsütsü army fighter jets amshia amakba tenük kuli alirtemi shiogo.

Omdurman yimti nung drone ka amshia mozüki ka amakdang civilian pezü tepset aser pezü yiru, ta Sudan indang health ministry ajanga ashi. Iba lendong ya RSFtemi agütsü, ta ministry ajanga tai tongloktsür.

Khartoum dak alaka ano tesashitiba rarabaji Sudan anüolen Darfur region nung lir, kong Sudan nung nütütsüng yongsük million 48 nungi quarter ka alir.

Yangji yimtsüng aser kiyong balala samatsü, kong civilian aika asüba aser ketdangsurtem tepsetba osangtem lir aser iba atema RSF aser sendaktepa aliba telungpur tenüng asener.

Crimea nung Ukraine nung drone tem nokdangogo: Russia

Moscow, Chiteni/July 16 (Agencies): Russia indang air defence forces aser Black Sea nung amenoka aliba rongtemi Crimea kübok Sevastopol rongnendak Ukraine nung indang drone teku khazüka yokogo, ta ketdangsurtemi metetdaksü.

Sevastopol nung Russia-i amenoktsür aliba Angh Mikhail Razvozhayev-i ashiba agi, drone tem yagi Deobarnü Sevastopol rongnendak aser yimti kübok

Balaklava aser Khersones district maka liasü.

"Tzüyim aser yimti nung osettsüt kecha meraksa," ta paisa Telegram messaging app ajanga metetdaksü.

Drone ka tzüyim nung khazüka yok, drone pongu Russia indang electronic warfare forces-i khazüka yok aser water surface drone ana tzüküm nung khadangogo, ta paisa shisem.

Crimean Peninsula amakba

indang Kyiv-i kecha osang magütsü. Crimea ya Russia-i 2014 küm Ukraine ket nungi atsünga liasü.

Ukraine-i tang tashi nung Russia mesüra Ukraine nung Russia-i amokbanger aliba tesemtem amakba indang yimjak nung nangzüka mali, saka parnoki, tawa Russia indang military infrastructure tem raksatsüba ajanga Kyiv nem teyari agütsür ta shia arudar.

Japan, S Korea, US nungeri military drill ayongzüka agi

Seoul, Chiteni/July 16 (Agencies): North Korea-i intercontinental ballistic missile (ICBM) ka tendangba sülen anogo ishika lir külen Japan, South Korea aser United States nungeri joint naval missile defence exercise ka ayongzüka agiogo.

Deobarnü ayongzüka agiba drill ya South Korea aser Japan tsünga international waters nung agia liasü, kong linük asem nungi destroyer tem nung Aegis radar system bener arua inyangshia liasü, ta South Korea Navy sangdong ka ajanga metetdaksü.

Navy ketdangsur kati ashiba agi, iba drill ya computer-simulated ballistic target ka poteta track asütsü aser iba dak sendakba nung osangtem lemsatepsü nükjidong nung ayongzüka agiogo.

North Korea-i parnoki tesüsabuba yangluba Hwasong-

18 missile tendangogo, koba Pyongyang-i ashiba agi, parnok indang nuclear strike force nung ajak dang tongtibangtiba lir. Iba missile ya Bodhbarnü linük anütok tsükümlen nungi tendanga liasü.

North Korea-i tawa, US indang spy tayimtsütem parnok indang exclusive economic zone waters adena senzüba atema ashishia aruba sülen iba missile tendangogo. Parnokisa US indang nuclear-powered cruise submarine kati tawa South Korea semdangba aitsüogo aser iba atema telangzüba tesashi agütsütsü ta nangzüka liasü.

Kasa mapang nung Seoul, Tokyo aser Washington-i ICBM tendangba aitsüogo aser ashiba agi, iba missile tendangba ya United Nations Security Council bangzüng anema lir aser iba ajanga Korean Peninsula aser tanga tesemtem

yimjung amokmerener.

South Korea Navy-i Deobarnü ashiba agi, iba drill ayongzüka agiba ajanga ballistic missiles anema military indang response capabilities tajungba küma yanglushitsü aser South Korea, Japan aser US tsünga security dak sendakba nung tesendaktep akangshitsü asoshi maangka agütsüogo.

"North Korea-i nuclear aser missile agi amokmerenba dak sendakba nung telangzüba tapet agütsütsü," ta Navy-isa ashi.

US aser parnok den sendaktepa aliba linüktemi North Korea indang missile tem dak sendakba nung osang agütsütepba tajungba küma yanglushitsü atema inyaka arudar.

South Korea aser Japan na US radar systems den sendaktepa lir saka linük ana indang radar systems bo sendaktepa mali.

MENUNGRA BILEMTETER

2nd Death Anniversary

Lt. Mrs. Maongsangla

17th July, 2023

"Kechiaser ni asoshi takum alibaji Khrista, aser tasütsüji tajangzük lir"-Filipi 1:21



Onok asoshi iba anogo süia or küm ana ajungdang ne temeim mapa tajungtem, temeim shisatsü aser sayubentsü O onok molung nung teti rizunga ayur. Tanü onoki na kanga menungraseta, sarasadema amonger. Anogoshia aser mapang ajak nung na onok molungjang nung teti alir.

Temeim Kinungbo, Chirnurtem, Semchirtem, Kinunger aser Anükapang

Office of the Akhoya Shisaluyimer Telongjem

TENÜNGSANG AGÜTSÜR

AST ajanga asen züngsem **Sb. Wapangmeren A Jamir** S/o. Wb. Arentemjen Jamir aser Wt. Yapangsangla, pai LI-NING 45th Inter District Badminton Championship 2023 Kohima nung asayaba mapang Doubles nung Champion aser Singles nung Runner-up takok anguba asoshi Office ajanga tenüngsang agütsür aser tepelaba lemsateper. Tsünga nungi ne sempet tajung tarutsü ne wadang ajak nung meneni moajangma.

Sd/-
Sb. Satemmongba
President

Sd/-
Kr. Chubakokla Lkr
Gen. Secretary

Office of the LONGJANG MEDEMSANGER PUTU MENDEN

(Longjang Village Council)

P. O Impur B. P. O Longjang, Mokochung, Nagaland

TENÜNGSANG AGÜTSÜR

Tawa sangdongba NPSC (CESE) 2022-23 tatidang nung takok anguba asoshi tsünga langlen agüja alirtem nem Longjang Medemsanger Putu Menden ajanga konang tetushi agütsür.

- Miss Katila Jamir**, D/o. Lt. Imli Jamir & Mrs. Mapula Pongen, Technical Education kübok Architecture nung Lecturer anguba.
- Miss Tainla Longchar**, D/o. Mr. Shilumeren Longchar & Mrs. Toshilila Imchen, School Education kübok English nung Post Graduate Teacher anguba.
- Miss Temjenjunga Longchar**, D/o. Mr. Longchenti Longchar & Mrs. Limala Aier, School Education kübok English nung Post Graduate Teacher anguba.
- Miss Tekalemla Longchar**, D/o. Mr. C Bendang Longchar & Mrs. N Atula Pongen, School Education kübok Education nung Post Graduate Teacher anguba.
- Miss Yashiyala T Imchen**, D/o. Dr. A Tekatemsu Imchen & Mrs. Suponaro, School Education kübok Mathematics nung Post Graduate Teacher anguba.
- Mr. Aochuba Jamir**, S/o. Lt. Merangjenba Jamir & Mrs. Imnatula Aier, School Education kübok Physics nung Post Graduate Teacher anguba.
- Maneni Ms. Anungla Pongener**, D/o Mr. Ngangnen Pongener aser Late Mrs. Imolemla, ajanga Zoology nung Degree of Doctor of Philosophy (Ph.D) ngutetba atema Putu Mendeni pelaba lemsateper.

Nenek ajak tarutsü wadang nung Tulusang Tsünga nungi moajang aser len aniang ta sarasademtsür.

Sd/-
Imti Aier
Chairman
Longjang Village Council

Sd/-
Alemtemjen Jamir
Secretary
Longjang Village Council

South Korea tzümetsüng: Nisung toku tasü mang ngutetogo

Cheongju, Chiteni/July 16

(Agencies): South Korea nung linük nung aliba Cheongju yimti anasa 'tunnel' ka tzü agi ketdangsur temi nisung tasü mang toku agitetogo.

Anogo aika tzünglu kanga sashia aruba ajanga ali telungleni lenmang tua aliba mubanga passenger aser driver tem pei gari nungi

madokteti akum.


South Korea nung tzümetsüng, anentsüh aser power cuts sülen nisung 37 asüba jangja lir.

Nisung toku tang tashi samar bushir.

Osong jila nung metre 685 talang tunnel nungya tang tashi nisung kwi aliar memetet, saka gari 15 tzü agi mubanger alitsü südi ta ashir.

(Maneni tapak 8 nung...)

Chennaiyin FC coach asütsü Owen Coyle shimogo



Chiteni/July 16, 2023
(Agencies): 2023-24 season atema Chennaiyin FC head coach asütsü Owen Coyle meyipa aruba club-i sangdong ka ajanga metetdaktüsü.

Scotland nunger coach shibai Premier League Manager of the Month asemben tashi agizüka lir pa ya Indian football circuit nung kanga nungtugu nisung ka lir aser pa lenisüba nung 2019-20 Hero ISL nung Chennaiyin FC pur final tonga asaya liasü.

"Owen Chennaiyin FC-i meyipa aruba atema onok

kanga pelar. Owen ya India atema ainer ka masü aser pai kechi inyakteter aji nguogo. Onok lanur team tejakdangi anitsü atema pa tapet lir aser pa meyipa aruba atema pelar," ta Chennaiyin co-owner Vita Dani-i ashi.

Arishi küm 57 tain coach yagi 2021-22 season nung Jamshedpur FC nungi ISL League Shield kokogo. Iba küm parnoki point 43 angu, koba iba asayamung puti otsü nung iba mapang season ka nung club kati point timtiba ngutetba liasü.

Coyle-i English Premier League nunga coach mapa inyakogo. England nung manager ama Mezüngbuba season inyakba mapang pa lenisüba nung Burnley pur EPL-i promote süa liasü. Iba sülen pa Bolton nung aden aser parnok mezüngbuba season nung FA Cup semifinals tonga asaya. Iba sülen pa Major League Soccer (MLS) nung Houston Dynamos nunga coach mapa inyakogo.

Tesüsa pa Scottish football second tier club Queen's Park Football Club nung inyaka liasü aser pa lenisüba nung iba club league stage nung tasembuba jenjang nung tembanga Scottish Premier Division atema qualify süa liasü.

Kasa mapang nung asayar ka ama Coyle ya striker ka liasü. Pa EPL nung asayaba dang masü saka Scottish Premier League nung Dundee United aser Motherwell nungia asayaogo. Pai asayaba mapang goal 300 dak tema idaktsür lir.

Queens Park FC den tenangzüktepba yanglur aliba tembanga sülenang Owen-i August ita nungiang club mapa belenzükettsü.

Asian Athletics Championships: Parul-i silver aser Ankita-i bronze medal angu

Chiteni/July 16, 2023
(Agencies): India tsürtem rongnungi long-distance runner Parul Chaudhary-i, Asian Athletics Championships tatabangbuba anogo 5000m asemtepba nung silver medal ngua iba asayamung nung tanabuba medal nguogo.

Chaudhary shibai Hokolbarnü 3000m steeplechase nung gold medal angu lai 5000m final nung alizüng 15 minutes 52.35 seconds nung tongteta Japan tsür Yuma Yamamoto (15:51.16) sülen tanabuba

jenjang nung tembanga liasü. Arishi küm 28 tain Chaudhary-i, 5000m national record (15:10.35) bena lir.

Kasa mapang nung Ankita-ia kasa asaya nung alizüng 16:03.33 nung tongteta bronze medal angu. Iba asaya nung India tsür anati medal ngua liasü.

Maneni kasa asayamung nung tetsür aser tebur 800m race nung Kishan Kumar aser KM Chanda nati kanga junga asema silver medal nguogo.

Kumar-i alizüng minute 1 second 45.88 nung tongteta pa Qatar nunger asemteper

Abubaker H Abdalla (1:45.53) sülen tanabuba jenjang nung tembanga liasü.

Tetsür asemtepba nung Chanda-i two-lap race nung alizüng 2:01.58 nung tongteta asem aser la Sri Lanka tsür MK Dissanayaka (2:00.66) sülen tanabuba jenjang nung tembanga silver medal angu.

Kumar-i taoba mapang nung iba asemtepba nung alizüng 1:46.17 nung tongteter liasü aser kasa mapang nung Chanda-ia alizüng 2:01.58 nung tongteter liasü, koba tenaporngla atema alizüng takaratiba tongtetba liasü.

South Korea tzümetsüng: Nisung...

(Tapak 7 nungi...)

Nisung tasü mang ishika bus ka nungi agitet. Nisung toku Honibarnü kumzüka liasü.

Tanünga asürtem ya timba tenem agi sünga aliba North Gyeongsang region nung lir, kong anentsüh ajanga nisung aliba ki nungzükter ao.

South Korea nung Honibarnü tzünglu 300mm (11.8in) jungnüa aruba osang lir.

Iba linük nung küm ka nung tzünglu ya 1,000mm (39.4in) nungi 1,800mm (70.9in) tashi arur aser itemji timba meyi mapang tsüker, ta Korean

Meteorological Association ajanga ashir.

Tzümetsüng agi kongshia aliba tesemtem nung tayimtsü nungi tangokba noksa nung molushi adenba tzümetsüng yagi ki ajunga metsüngbanger kilem dang tzüma nung adoka aliba nguogo.

Local government balalai nübürtem dang pei aliba tesem yutsür ainshitsü totuyuba agütsüba ajanga nisung meyirijang aika dak kongshio go aser Ato Kilonser Han Duck-soo-i mitkar dang yariteptsü asüngdangogo.

North Chungcheong nung aliba Goesan Dam nungi tzü mozüka alua ayimba ajanga Honibarnep nisung 6,400 shi ainshidaktsü.

Iba tzü nokdang anasa tsünglanglen aliba yimtsüngtem aser parnok den sendaktepba lenmang aika tzü agi mubanger parnok kidang nungi taolen mali kumogo.

Hokulbar aonung North Chungcheong nung anentsüh alua train ka lenmang tezülani ao. Iba lendong nung engineer ka yiru, saka train nung passenger meliasü.

US Open: Lakshya Sen semifinal nung tsükogo

Chiteni/July 16, 2023
(Agencies): US Open badminton asayamung tebur kija asaya semifinal nung kanga meranga asayar India nunger asayar Li Shi Feng mekoki liasü.

Commonwealth Games gold medallist, Lakshya shiba iba asayamung nung seed tasembuba nung liasü pai iba asaya nung 17-21, 24-22, 17-21 agi second-seed asayar Feng-i koka liasü. Tena tsüngda ghonda ka ser minute 16 asaya liasü.

Mezüngbuba game nung Feng aser Lakshya na kanga toktepa asaya aser point 17buba tashi kasasa dang asaya liasü, ajisüaka iba sülen Feng-i kanga aggressive süa asayaba den Sen-i aibelen kar menaba ajanga pa tejakdang kuma asaya akok.

Mezüngbuba game mekokaka Sen-i memerandangi toktsütsü memulungi tanabuba game nungbo asendenshir kanga

Mezüngbuba game ama tanabuba game nunga tena kanga toktepa asaya aser kati ka nem kecha maongka magütsütepi asaya.

Asayar ana tsüngda rally talangla asaya aser shot balala asaya-a kati ka ashioktsüteptsü meranga asaya aser point 22 tashi kanga toktepa asayaba sülen Lakshya-i point ana atonga ngua asaya akok aser decider asayatsüsa aküm.

Tasembuba game ya-a mezüngbuba game mesüka asaya aser break tashi nung Geng 11-8 agi tejakdang liasü.

Ajisüaka point 17buba tashi Sen-ia metoktsüi asaya, saka iba sülen China nunger asayar yagi asendenshir tajungba asayateta asaya akok.

Tena tsüngda tang tashi nung tiben asayaogo aser Sen-i ponguben aser Feng-i asemben kokogo. Taoba Canada Open final nungbo Sen-i 21-18, 22-20 agi Feng madak takok ngur liasü.

Messi aser Inter Miami na tenangzüktepba tambanga yangluogo



mezüngbuba asayatsü imlar.

Kasa mapang nung team kibur David Beckham-i,"ni LA Galaxy-i aruba mapang United States nung football asaya ajungkettsü atema koba nükjidong yur aru iba kasa nükjidong aliba alima nung asayar tajungtibatem anir arutsü kü nükjidong liasü. Tanü iba pungmang asangsang kumogo. Leo amala asayar ka onok club-i aruba atema ni kanga nema adanger aser iba den medemer tajung, nisung tajung ka aser par kibong Inter Miami community nung arua densemba atema kanga pelar," ta ashi.

Messi team nung adenba ajanga United States nung football asaya nem teyari tulu agütsütsü, kong iba asaya ya popularity dak sendakba nung tanga professional league tem dang nungi atsüngzüka lir.

Deobarnü Messi DRV PNK Stadium nung fan tem den metetpelaba mapang agiogo aser Hombarnü press conference ka ayongzüka lir, kong Messi aser Miami club kiburtemi shilem agitsü.

"Alima nung asayar tajungtibai Inter Miami aser MLS shimba atema onok kanga pelar aser pai iba telemtetba agiba ajanga League aser North America nung iba asaya renlokyonga aoba sayur," ta MLS Commissioner Don Garber-i ashi.

Chiteni/July 16, 2023
(Agencies): Major League Soccer (MLS) club Inter Miami-i Honibarnü sangdong ka ajanga Lionel Messi den tenangzüktepba tambanga yangluba sangdongogo.

Pa iba club nungi 2025 küm tashi asayatsü ta club-isa metetdaktüsü.

Arishi küm 36 tain Messi-i ashiba agi, "Iba ya maongka tajung ka aser longjemer iba project ya tejakdangi bener aotsü. Onoki nükjidong ayubatem tongtettsü asoshi tebilemba lir aser iba club nung asaya tenzüka teyari agütsütsü yongya tar." Messi taruba Honibarnü Leagues Cup nung Miami pur Mexico nungi Cruz Azul den asayaba mapang

BILEMDANGANG

"Tatok magütsütetera pela malitsü."